
რტოო პალმისა, მშვიდობის რტოო,
აქ ზვირთი ზღვისა ჟღერს უბოლოო,
აქ სიმშვიდეში ვხედავ აღზნებულს
სანაპიროებს გაჩირალდნებულს.
აქ გემებია და ზღვის ქედები,
იქ, შორს, ძლიერ შორს როს იხედები,
სჩანან უსაზღვრო სივრცედ ნადები
სასაფლაოთა მირიადები.
კანკალებს გემთა შემკრთალი ალი,
შენსკენ მხარულით მისცურავს ქალი,
გრიგალი სწეწავს მის თმათა გიშერს,
იგი გემახის, იგი ხელს გიშვერს:
გამწარებული და უსასოო.
რტოო პალმისა, მშვიდობის რტოო!